

À Henri-Désiré HINS.

Li maïsse curé

Di ç' timps-la, li mayeûr, li maïsse di scole, li docteûr – s'i-gn-aveûve onk au viladje – èt l' curé avin.n' tot à dîre. Èt ni nin passer par zèls, c'èsteûve s'aler mète dins lès miséres.

Trwès samwin.nes qu'i n' fait qui d' ploûre. Èt su saquants djoûs, il è vûde come vatche qui piche. Dispû djwèdi portant, li timps a candjî. I lût dès quate solias. Li dîmègne, li cinsî s'a rademint mètù al bèsogne po rentrer sès foûres.

'Avoz stî l' dimander au curé !', aveûve risqué l' cinseresse.

– 'Dji n'a nin l' timps d' ratinde j'qu'à non.ne, don ! I n' sèrè nin conte !

– Èstoz bin sûr ?', lî aveûve-t-èle rèspondu !

Èle saveûve bin, lèye, qui l' vî ome n'èsteûve nin todi dès pus aujîy.

Li dîmègne d'après, i n'a nin falu ratinde longtimps po comprinde qui l' curé n'èsteûve nin binauje. Oyi, ça !

Après l'èvanjîle, di s' tonia, i vos-a èvoyî onk di sès fèls préchemints, qui l' ciél è tron.ne co asteûre.

R'waîtant do costé do bon Diè, i lî d'mande :

Èst-ç qui dj' pou bin l' zî dîre ?'

'Oyi ! Dji pou bin !'

Èt bin, Sègneûr, lès djins d' véci, bièsses vos m' lès avoz d'né, don ! Èt bin, bièsses, dji vos lès rindrè !'

Nin on mot d' pus. Èt tot foû d' li, i dischind po-z- aler ataqwer l'ofrande.

Bernard Van Vynckt